

Broj: 01-45-1-04759/2021

Datum, 29.9.2021. godine

ŽURNAL

Radićeva 2
71000 Sarajevo

FOKUS.BA

Zmaja od Bosne 60
71000 Sarajevo

SLOBODNA BOSNA

Musala 1
71000 Sarajevo

www.cazin.net

Email: info@cazin.net

DNEVNIK.BA

Kralja Petra Krešimira IV b.b. (TC Rondo)
88000 Mostar

www.normala.ba

Email: midho.dedic@gmail.com

VIJEĆE ZA ŠTAMPU U BiH

Trampina 8
71000 Sarajevo

www.crnahronika.ba

Email: crnahronikainfo@gmail.com

PREDMET: Reagovanje, *dostavlja se*

Poštovani,

Dana 17.9.2021. godine, Federalna uprava za inspeksijske poslove dobila je pomalo čudan medijski upit gospođe Branke Mrkić - Radević, novinarkе „Žurnala“, sa samo jednim pitanjem koje je glasilo: „U vezi sa vašom objavom od 5.8. ove godine na linku - <http://www.fuzip.gov.ba/vijest/federalni-trini-i-saobraajni-inspektori-u-nadzorima-na-turistikim-destinacijama-u-fbih-522> - molim vas da precizno navedete pojedinačno sve općine/gradove u kojima su inspektori kontrolisali poslovanje na turističkim destinacijama. Ovdje je naveden Neum, da li je bilo još gradova/općina/mjesta gdje su inspektori vršili kontrolu ovog ljeta?“

Kao i do tada, na sve prethodne brojne upite Žurnalovih novinara, Federalna uprava za inspeksijske poslove je blagovremeno odgovorila i novinarki informaciju dostavila u traženom roku – prije kraja radnog vremena, iako je i samo pitanje budilo sumnje u namjere tražioca informacije.

Da su naše sumnje bile opravdane, pokazalo se još istog dana, kada je na portalu „Žurnala“ osvanuo naslov **“NOĆ OD 500 KM: Direktor Federalne uprave za inspeksijske poslove nelegalno iznajmljuje vilu u Blagaju”** (<https://zurnal.info/novost/24320/direktor-federalne-uprave-za-inspeksijske-poslove-nelegalno-iznajmljuje-vilu-u-blagaju>).

Da je gospođa Radević, novinarka i dobitnica nagrade EU za istraživačko novinarstvo(!), primijenila osnovne profesionalne i etičke principe i standarde novinarstva iz Kodeksa za štampu i online medije BiH, te u duhu pravednosti, istinitosti, pristojnosti, tačnosti i fer izvještavanja direktoru Ajdinoviću i ovoj Upravi uputila upit ili dala mogućnost odgovora, saznala bi da niti jedan od navoda o nezakonitosti postupanja direktora Ajdinovića iznesenih u članku nije tačan.

Naime, tačno je da je direktor Ajdinović vlasnik pomenute kuće, za čiju izgradnju je podigao pozamašan kredit kod komercijalne banke u BiH, na što ima puno pravo kao i svaki drugi građanin BiH, ali je isto tako činjenica da je istu dao pod zakup za koji su uredno plaćeni svi pripadajući porezi, što se može i provjeriti kod nadležnih organa.

Vrtić u vlasništvu direktorove supruge djeluje od 2011. godine i uredno je registrovan, za što posjeduje svu potrebnu dokumentaciju, što se također može provjeriti kod nadležnih organa.

Vežano za navode o radnom angažmanu direktora Ajdinovića u ovoj Upravi, obavještavamo vas da je novinarka istraživanjem mogla doći do saznanja da je Zakonom o inspekcijama u Federaciji BiH iz 2005. godine predviđeno formiranje Federalne uprave za inspeksijske poslove kao samostalnog organa uprave u FBiH. Proces reforme inspeksijskih organa u BiH je proveden pod pokroviteljstvom Svjetske banke, na osnovu analize rada inspekcija u BiH izvršene 2003. godine. U okviru tog procesa je, kako bi se stvorili preduslovi za formalno uspostavljanje Federalne uprave za inspeksijske poslove od 1.1.2007. godine, Vlada FBiH u julu 2006. godine imenovala prvog/privremenog direktora Uprave (gospodina Ibrahima Tirka), nakon čega je, kroz redovnu proceduru, zaposlena i grupa uposlenika među kojima je bio i sadašnji direktor, Anis Ajdinović. Kao što se može vidjeti iz njegove biografije objavljene na web stranici ove Uprave (koja iznad svega svakodnevno nastoji potvrditi svoju opredijeljenost ka javnosti i transparentnosti rada, čemu svjedoče svi medijski djelatnici koji su nam se obratili, kao i količina podataka koje objavljujemo), direktor Ajdinović je ovdje proveo čitav svoj dosadašnji radni angažman i bio je uključen u sve procese uspostave, razvoja i rada Federalne uprave za inspeksijske poslove. Također je vidljivo iz biografije da se direktor Ajdinović tokom cijelog svog radnog angažmana u ovoj Upravi konstantno i kontinuirano usavršavao i educirao, kako formalno, tako i neformalno. Raduje nas što će svoje znanje i kompetencije iz oblasti rada inspekcija direktor uskoro krunisati i doktorskom disertacijom.

Inače, proces reforme inspekcija je proveden upravo s ciljem uspostavljanja novog, adekvatnog, racionalnog i efikasnog načina obavljanja inspeksijskog nadzora čija je suština obezbjeđivanje poštivanja relevantnih propisa i održavanje propisima uređenog stanja. Inspeksijski nadzor, kao vrsta upravnog nadzora, spada u poslove organa državne uprave u funkciji javnog interesa, ali i solidarnog, zajedničkog interesa građana i društvene zajednice, jer se uređenjem djelatnosti primjene pravnih propisa neposredno utječe na razvoj kulture njihovog poštivanja i podstiče razvoj kolektivne svijesti o društvenom značaju zakonitosti rada i djelovanja.

Koristimo priliku da vas informišemo da u sastavu ove Uprave djeluju 11 inspektorata i Sektor granične inspekcije (za prekograničnu kontrolu roba), koji svojim svakodnevnim radom, kroz preventivno, korektivno i represivno djelovanje nastoje doprinijeti uređenju stanja i podizanju stepena poštivanja zakonitosti u oblastima regulisanim sa preko 800 zakonskih propisa koje ova Uprava provodi. Važnost naše uloge u suzbijanju sive ekonomije se, između ostalog, demonstrira i kroz broj izrečenih upravnih mjera, gdje, nažalost, dominira značajan broj represivnih mjera – prekršajnih naloga i kazni, koje oslikavaju loše stanje u toj oblasti (a koje novinarka svojim člankom problematizira, na taj način ekskulpirajući prekršioce, čime *defacto* podržava i ohrabruje nezakonito poslovanje). Našim djelovanjem, između ostalog, doprinosimo zaštiti zdravlja ljudi, biljaka i životinja, okoliša, potrošača i drugih veoma važnih prava građana, o čemu redovno informišemo javnost putem naše web stranice i saopćenja za javnost. Tim više je odgovornost novinarkе za narušavanje ugleda i

kredibiliteta ovog organa *nemjerljiva*. Nadalje, iznošenjem takvih notornih laži, direktno se destabilizira i degradira funkcija državnog organa - Federalne uprave za inspekcijske poslove i ugrožava suština i postupak inspekcijskog nadzora, kao i sigurnost inspektora. „Žurnal“ je izbjegao pristupiti samoregulaciji i u smislu administriranja facebook profila, gdje su omogućeni uvredljivi, omalovažavajući i optužujući komentari koji su utemeljeni isključivo na netačnim, dezavuirajućim i malicioznim navodima novinarkе Radević.

Na koncu, obavještavamo vas da će direktor Ajdinović zaštitu svojih prava i naknadu štete zbog klevete zatražiti na nadležnom sudu. Nažalost, svjesni smo da naknada štete, ma kako visoka bila, ne može ni na koji način kompenzirati nemjerljivu dugoročnu štetu nanесenu Federalnoj upravi za inspekcijske poslove. Budite uvjereni da ćemo javnost (a i nadležne organe) obavijestiti o svakom obliku i slučaju ugrožavanja postupka inspekcijskog nadzora koje je prouzrokovao ovaj zlonamjerni i neistiniti članak.

Od svih web portala iz naslova tražimo hitno uklanjanje navedenog teksta sa istih i sa društvenih mreža koje uređuju, kao i objavu ovog reagovanja na njihovoj početnoj stranici.

Ukoliko se od strane web portala iz naslova na koje se odnosi ovo reagovanje hitno ne ukloni navedeni tekst, te ne objavi ovo reagovanje, bićemo prinuđeni da putem nadležnih pravosudnih organa zatražimo adekvatnu zaštitu.

Ovim se također obraćamo i Vijeću za štampu u Bosni i Hercegovini zahtjevom da naše reagovanje tretira kao **prigovor na netačno, neprofesionalno, neetično i maliciozno izvještavanje novinara i obmanjivanje javnosti, te nanošenje štete ugledu i reputaciji direktora Federalne uprave za inspekcijske poslove, kao i funkciji, integritetu i kredibilitetu Federalne uprave za inspekcijske poslove kao samostalnog organa uprave u FBiH.**

S poštovanjem,

Dostavljeno:

8 x Naslovu
1 x Evidencija
1 x Arhiva



Pomoćnik direktora i službenik za informisanje


Dr. sci. Merima Tanović